



N°2091
Entrée le 14.03.2025
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 14.03.2025
Chambre des Députés

Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 13/03/2025

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un de Minister fir Bildung, Kanner a Jugend weiderzeleeden.

En Enseignant aus der Grondschoul huet an engem virale Facebook-Post iwwer d'Onmuecht vun de Schoulen am Ëmgang mat gewaltbereete Schüler bericht an d'Versoe vum Schoulsystem ugeschwat.

An ze ville Klassen wäeren physisch a verbal Gewalt ëmmer méi zum Alldag ginn. Aner Kanner hätten dowéinst Angscht fir an d'Schoul ze goen an och d'Qualitéit vum Cours géif staark ënnert dës Situatioun leiden. Vill Enseignanten hätten zwar schonn u Formatiounen zu Gewalt an Deseskalatioun Deel geholl a géife ganz vill Stonnen investéieren, fir de verhalensopfällege Kanner ze hëllefen. Doduerch géifen awer vill wichteg Ressourcen op e puer wéineg Kanner konzentréiert ginn, soudass net nëmmen aner Kanner, déi och op spezifesch Hëllef ugewise wieren, dës net méi kréien, mee generell déi aner Kanner géifen op der Streck bleiwen.

Déi Situatioun weist drop hin, datt et e strukturelle Problem gëtt, wéi d'Schoule mat dëser Erausforderung ëmginn. D'Gewalt an de Schoulen ass e ganz seriösa Thema, dat net nëmmen d'Sécherheet an d'Wuelbefanne vun de Schüler a Léierpersonal betrëfft, mä och en Impakt op d'Léierëmfeld an d'Qualitéit vum Enseignement huet.

An deem Zesammenhang wëllt ech dem Minister dës Froe stellen:

1. A verschiddenen Interviewen huet de Minister ze vill Zäit virum Bildschirm als eng méiglech Ursach fir déi méi héich Zuelen u verhalensopfällege Kanner genannt. Aner méiglech Ursachen goufe bis elo awer net genannt. Am Wort-Artikel ginn vum betroffenen Enseignant och d'Betreiungsstrukture genannt, an deene vill Kanner scho vu Klengem uns, vill Stonnen an ze grouse Gruppe géife verbréngen.

Wäert de Minister wëssenschaftlech Etuden an Optrag ginn, fir konkret ze klären, wat déi genau Grënn an Ursachen dofir sinn, dass et haut däitlech méi Kanner mat Verhalensopfällegekten hei am Land ginn?

2. Zënter der Reform vun 2009 ginn d'Elteren als Schoulpartner ugesinn, déi a schoulesch Belanger müssen agebonne ginn. Am Interview mam Wort gëtt och de Problem opgeworf, dass den Enseignanten d'Hänn gebonn sinn, wann Elteren eng Therapie oder aner Mossnamen ofleenen



www.piraten.lu

an wëllen, dass hir Kanner an der regulärer Schoul bleiwen.

Ass de Minister net der Meenung, dass et a Fäll vun extremer physescher Gewalt trotz dem Veto vun den Elteren misst méiglech gemaach ginn, fir dat betreffent Kand aus der regulärer Klass ze huelen, fir domat den Enseignant an déi aner Kanner an der Klass ze schützen?

Mat déiwem Respekt,



CLEMENT Sven
Deputéierten





**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro
Nr. 2091 vum honorabelen Deputéierte Sven Clement**

Ad 1)

Verhalensopfällegkeete bei Kanner sinn e Symptom, dee vill Ursaache kann hunn. Mat deem externaliséierte Verhalen dréckt d'Kand en Onwuelsinn respektiv eng Iwwerfuorderung aus. D'Grënn fir dës Iwwerfuorderung reechen vu feelende sozio-emotionale Kompetenzen iwwer eng Autismus-Spektrum-Stéierung bis hin zu traumatiséierte Kanner a schwéiere klimesche Fäll. D'Diskussiounen iwwer d'Verhalensopfällegkeeten hunn d'Tendenz, dës Differenzen ze verwëschen, déi awer essentiel sinn, wann et dorëm geet, eng adequat Äntwert dorop ze fannen.

De Ministère huet dofir den Observatoire national de l'enfance, de la jeunesse et de la qualité scolaire (OEJQS) domat beoptraagt, eng wëssenschaftlech Analys iwwer Verhalensstéierungen bei Kanner a Jugendlechen ze maachen. Fir dës Etüd duerchzeféieren, kooperéiert den OEJQS mat zwou internationalen Institutiounen: der *Interkantonale Hochschule für Heilpädagogik* (HfH) zu Zürech an dem *Deutsches Jugendinstitut* (DJI) zu München. Éischt Resultater vun dëser Etüd ginn sech fir den Hierscht 2025 erwaart.

Ad 2)

D'Gesetz iwwer d'Inklusioun gesäit vir, dass d'ESEB (Équipe de soutien des élèves à besoins éducatifs spécifiques) am Krisefall kann an der Schoul intervenéieren, fir d'Situatioun ze stabiliséieren. Dëst och ouni d'Zoustëmmung vun den Elteren. De Ministère schafft doriwwer eraus un enger ganzer Rei vu Mesüre fir d'Interventioun am Fall vu Krisen, déi an deene kommende Méint en place gesat wäerte ginn.

Lëtzebuerg, den 29. Abrëll 2025

De Minister fir Educatioun,
Kanner a Jugend

(s.) Claude MEISCH